

經世文續編

皇朝經世文續編卷六十五目錄

兵政四

屯餉上

伊犁興屯原始

松筠

請於南路雇募民苗稟

胡林翼

松郡民團經久芻議

賈履上

裁屯田議

馮桂芬

17
有籌撥甘省糧臺暨新疆餉項疏

駱秉章

皇朝經世文續編卷六十五

上海萬士濬子源輯

兵政四 屯餉上

伊犁興屯原始

松 筠

新疆各城屯田有兵屯有回屯有戶屯而無旗屯惟伊犁皆有之兵屯者綠營兵丁之屯回屯者回民之屯皆創自乾隆二十五年時初設兵駐守 高宗純皇帝以武定功成農功宜舉 特命參贊大臣阿桂專理屯田由阿克蘇率滿洲索倫驍騎五百名綠營兵百名回子三百名越穆蘇爾達巴罕至伊犁鎮守辦事搜捕瑪哈沁招撫潰散之厄魯特即以綠營兵築城回子乘時興屯開渠灌漑是為伊犁屯田之始二十六年至三十四年陸續由內地增調屯田兵至二千五百名五年更替以五百名差操二千名屯種四十三年將軍伊勒圖奏准改為摺管定額三千名以五百名差操二千五百名屯種分為二十五屯仍視倉儲之多寡隨時增減屯種此兵屯也回屯自阿克蘇原帶回子三百名於伊犁河南海努克之地分撥墾種次年調取伯克並由烏什葉爾羌和闐哈密吐魯番等處陸續增調回子至三十三年共有大干三百八十三戶內除彥齊回子 彥齊者隨伯克品級給與服役之回子 三百二十三戶種地所生之麥大小伯克及挖鐵回

子六十戶養贖口糧外奏定種地回子六千戶分爲九屯於固爾札建甯遠城居之設阿奇穆伯克管轄此回屯也戶屯者商民之屯創自乾隆三十七年將軍舒赫德奏明客民莊世福等四十八戶以無礙屯工之隙地請撥令開墾卽於本年陞科永爲土著此戶屯也以上兵回戶屯等項行之有年其來已久惟旗屯一項則前此所未有至嘉慶七年而始興先是乾隆二十九年奉 高宗純皇帝諭旨伊犁田土肥潤如數多人耕作莫若令滿洲官兵分種旣得勤於力農而於養贖家口喂養馬匹均屬有益著查明地畝俟滿兵到齊後酌量分給耕種欽此其時將軍明瑞覆奏以附近伊犁二百里以內可種之地甚多俟官兵到齊再爲妥議辦理嗣於回屯之東開築新渠因地勢較高未就緒而罷三十七年又設法引水爲土爾扈特屯田不一二年亦罷迨乾隆五十年五十五年疊奉 諭旨駐防官兵生齒日繁而國家經費有常伊犁地廣田肥著賞給官兵地畝佃人耕種用資生計欽此歷任將軍皆以灌溉乏水未及籌辦嘉慶七年將軍松筠相度地形親爲履勘始得導水要領奏明於惠遠城東伊犁河北岸濬大渠一道逶迤數十里引用河水灌田又於城西北草湖中求得泉水設法疏濬築堤岸開支渠引溉旗屯地畝又於城東北就渠畔擇可種善地分授惠遠城官兵播種而以前此綠營裁撤之屯授惠甯城八旗官兵均令閒散餘丁代耕並僱人佃種永爲世業得 旨允行嗣又濬大渠一道與前所濬之渠通名通惠渠並於其

東阿齊烏蘇地方墾大渠引丕里沁山前之水灌田數萬畝此又旗屯之所由始也

附屯務成案

乾隆二十五年辦事大臣阿桂奏伊犁增添兵丁及種地回子並修築城垣等事一摺奉 旨着軍機大臣核議具奏欽此當經據款核覆一原奏內稱伊犁種地回子現有三百名宜於次年再添七百名以足千名之數適經舒赫德奏派回子五百名令其攜眷於來年時每名應備帶小麥大麥籽種各五斗穀黍籽種共五斗農具馬匹牲畜等項俱照本年移來回子之例辦理令其於正月初間卽由阿克蘇等處起程以便二月初間雪消之際卽抵伊犁種地除咨行舒赫德外尙應添回子二百名俟伊犁麥收後再行撥發前來等語查伊犁地方地廣而肥若將種地回子等多爲撥給實屬有益但移駐種地回子所需口糧籽種馬匹牲畜若令一時全行辦理各城回子等設措不免拮据自應陸續撥發應如阿桂所奏飭令舒赫德等妥爲辦理所請麥收後撥發二百戶回子若能同五百戶回子於正月內卽一併發往甚善儼不能一併發往麥收後種地之時已過與其抵彼徒糜口糧甯俟秋收後再行撥發不但由阿克蘇起程不至拮据而伊等至彼不久卽屆春季種地亦不致糜費口糧應請飭將此項二百名回子於來年秋季落雪以前卽令起程撥往一原奏內稱伊犁地方外界哈薩克布魯特本年

三百名回子始種三百石籽種除養贖伊等本身妻子應留籽種外回子五百名合此回子三百名每名若令種一石五斗籽種十五分收穫可得糧一萬八千石二十分收穫可得糧二萬四千石雖至少亦數一千戶回子二千五百名兵丁一年口食伊犁現有兵丁九百餘名請於來年再添撥一千五百餘名現有滿洲索倫察哈爾兵八百餘名外再派馬兵六百餘名除現有綠營兵一百名外再添綠營兵九百名此項增添之兵舒赫德處先添馬兵四五百名於來年春間應撥五百名回子起程之際一併發來照本年春間帶來官兵之例辦給米麪羊隻其餘兵丁俱俟麥收後起程祇辦給沿途口食等語查伊犁駐防兵丁宜量回子等所種地畝收穫數用再為陸續增添駐防本年三百名回子所種地畝收穫之糧卽數千餘名兵丁口食來年若再添回子耕種可得二千五百名兵丁一年口食請如所奏由葉爾羌喀什噶爾阿克蘇等城調派滿洲索倫察哈爾兵六百名綠營兵四百名由烏魯木齊調派綠營兵五百名添駐伊犁不惟口糧易得而於防守地方有裨此項往駐兵丁於春間護送種地回子之時先令幾百名起程秋季幾百名起程所需口糧等項如何辦給之處應飭令舒赫德行文與阿桂商酌辦理一原奏內稱來年回子足數千名耕種所收之糧於壬午年卽數三千名兵丁口食來年秋季播駐綠營兵千名抵伊犁後卽先令耕種秋麥壬午年春季再令耕種小麥大麥數黍計一千名

綠營兵丁一千戶回子耕種所收之糧足數六千名兵丁口食察看此地情形尙毋庸許多兵丁若有兵四五千名卽足敷用但伊犁地處極邊界連外夷若駐兵五千請駐滿兵三千名綠營兵二千名若駐兵四千除一千名種地綠營兵丁外請再撥綠營兵一千名前來令其蓋房築城俟換班之際再行擬定數目等語查現在固爾札海努克察罕烏蘇等處令回子居住耕種地畝於哈薩克布魯特連界之處安設卡倫防守地方需兵較多若駐兵五千部伍成而威勢盛但駐兵必裁度該處分例不使糜費內地帑項於事方有裨益今阿桂雖稱年來一千名回子一千名綠營兵丁所種之糧除留存籽種外可敷六千名兵丁口食然必須耕種一年得實在收穫數目方可裁度定擬駐兵之數莫若於來年秋收後裁度秋收後實收穀石數目如數駐兵五千俟奏到之日將出派何處兵丁如何擬定年限換班之處再行定議一原奏內稱伊犁名勝之地河北無過固爾札河南無過海努克若論田地肥沃無過察罕烏蘇其海努克地方現有回子三百名卽令其居住不使移動海努克地方請建一小城駐兵數百名以邊哈薩克布魯特等所通之路至察罕烏蘇地土肥沃種地一千名綠營兵丁卽在察罕烏蘇居住建一小城池以邊哈薩克布魯特由伊犁河北所來之路請將來年冬季起陸續前來之七百戶回子俱令駐劄固爾札建一六城所有大臣衙署及倉廩房閤俱修於此著馬兵等於草青之時擇

水草善處牧養馬匹牲畜以便各路遠出巡防俟草黃落雪以前各令回城附近度冬但目今穀尚未積不便卽調築城兵丁俟壬午年夏季所撥一千名綠營兵到來專令責成築城蓋房等事其種地兵丁回子等亦令其暇時幫助使一年限內完竣等語查伊犁種地駐兵宜於形勢之地修建城池以遷外夷今固爾札海努克察罕烏蘇雖俱係形勢之地但固爾札野柴稀少若修建大城令多人居住不得柴薪兵丁不免拮据應於烏哈爾里克察罕烏蘇哈什噤吉期伯勒齊爾等處廣有樹木之地或近產煤之處多駐兵丁方屬有益請令阿桂另行詳視定議其海努克地方修一小城現有三百戶回子不使移動仍駐兵數百名以防西通哈薩克布魯特之路察罕烏蘇地方建小城池令種地一千名綠營兵丁居住以防哈薩克布魯特由河北所來之路馬兵於草青之時擇水草善處牧馬以便各路遠出巡防俟落雪旋回等欸均如所奏辦理再修建城池雖據阿桂稱於壬午年夏季撥綠營兵一千名令其專修并令種地兵丁回子等暇時幫助一年限內完竣但現在伊犁駐兵俱係裁度該處收穫糧石數目方能定議若因築城復多派兵一千名該兵丁等到彼並不種地豈不糜費口糧計現在該處所有綠營兵丁種地回子及來年添撥綠營兵丁種地回子既有二千餘名應令於種地餘暇漸爲築城其二千人之力亦與一千人之力相等築城須定年限亦毋庸一時完竣應請令阿桂通融酌辦一

原奏內稱現議來年秋季增添一千名綠營兵丁種地而牲畜在所必需烏魯木齊所有換獲哈薩克馬六百餘匹雖經舒赫德奏備伊犁之用爲數尙有不敷嗣後再有換獲馬匹於來年草青之際令安泰等一併措辦千餘匹送來應用外哈密巴里坤上年撤回兵丁有無回交馬匹亦令行查鄂吉永甯處令備需用再由阿克蘇等處至伊犁有一千餘里兵丁撥移前來必須馱載牲畜雖據舒赫德具奏由烏魯木齊駝隻內調取三百隻但回子地方不宜駝隻秋季倒斃更甚現今烏魯木齊尙有駝七百隻請由安泰處擇五百隻於來年草青之時委員運送之便即將一千名綠營兵丁所需農具一併措辦馱載前來將駝隻卽在伊犁牧放其阿克蘇等處應撥兵丁如需用駝隻卽將此項駝隻趕往應用等語查來年伊犁添駐兵丁必需馬匹駝隻應如阿桂所奏飭令安泰等現有馬匹委員送往來年伊犁添駐九百名綠營兵丁臣等議得應由阿克蘇派四百名由烏魯木齊派五百名既經舒赫德將烏魯木齊駝隻調取三百則由阿克蘇派出四百之兵起程時卽着用此三百駝隻外烏魯木齊既有駝七百餘隻亦如阿桂所奏擇五百隻令馱載一千人種地所需農具卽交此項五百兵帶往嗣後添撥伊犁種地兵丁卽就近由烏魯木齊等處現有兵丁內調撥可免由內地派出之煩等因素 硃批帶領烏魯木齊兵丁前往時著派安泰餘依議欽此

乾隆三十一年七月將軍阿桂奏言新疆地方種地兵丁每名收穫十一石以上細糧將官兵議敘者原因初墾地畝之際示以優獎現在可耕之地雖肥瘠不一亦不甚懸殊全賴擇地引水勤力耕作果將力耕多收者加倍獎勵收穫懸殊而數年以來漸次加增有收至細糧二十七石有餘者烏魯木齊等處每年每兵不過收至細糧十四五石雅爾即今塔爾巴哈台地方去歲每兵始收細糧十一石三處收穫分數懸殊而官兵議敘纖毫無異今各處官兵俱經住定不比初種地畝之時宜將獎敘之例更定永遠遵行每名得細糧十一石除本處食用外計每名每日應得八合三勺尚不敷三人之需嗣後請停止議敘每名若收細糧十八石除本身食用尚可食養五人請照現在議敘之例給予議敘每兵若收至細糧二十八石除本身食用儘可食養八人請由現在議敘外再加獎勵給予議敘如此不惟奮勉種地官兵益相鼓勵而不甚奮勉種地官兵亦知奮勉實於官兵邊儲均屬有益等因奉 旨軍機大臣議奏欽此經軍機大臣議覆應如所奏嗣後種地兵丁每名收至細糧十一石者停止議敘每兵收至細糧十八石者仍照現在議敘之例給予議敘收至細糧二十八石者由現在議敘例外加倍議敘奉 旨依議欽此

乾隆四十七年四月將軍伊勒圖奏言從前因伊犁地方未有積貯糧石曾由屯田綠營兵丁三千內

除各項差使五百名每年令二千五百名種地納糧數年以來積貯之糧現在五十萬餘石足敷三年支放每年綠營兵丁并民人回子等所交之糧約可得十八萬石除一年支放外尙可餘二萬石每歲積貯糧石太多以至霉變似屬無益而兵丁等若不善爲操練亦屬無益請由屯田綠營二千五百名兵丁內撤出一千名令一千五百名種地一千五百名操練技勇如此每歲更換一半操練技勇新疆駐劄兵丁技藝爛熟而一半兵丁每歲種地收穫若豐所得糧石卽敷支放倘遇稍歉之年積糧旣多儘可無虞奉 硃批知道了欽此

乾隆五十四年正月將軍保甯奏查前任將軍伊勒倉貯之糧五十餘萬石積糧太多以至霉變似屬無益請由二千五百名種地兵丁內撤出一千名裁減十屯令一千五百名種地一千五百名操練技勇今數年所收穀石分數二十三四五分不等計每歲所收俱以二十四分爲準收穫四萬二千餘石再發交綠營種地爲民遺犯等交糧一千餘石回子等交糧九萬六千石及各倉斛面浮出之糧三千石一年共可得糧十四萬三千餘石現今伊犁一年支放共需糧十六萬六千餘石尙欠不敷糧二萬三千石俱由倉貯五十餘萬糧石內陸續填補現已剩糧三十餘萬石雖尙敷添放數十餘年但伊犁地處極邊若不稍備存貯餘糧倘遇有歉收或有需糧之事倉貯糧石不能接濟實有關係理宜預

籌辦理由現在各差行走一千五百兵丁內留八百名照舊操練技勇充當各差外以七百名增設七屯令自來年種地計一年二十四分收穫可得糧一萬九千餘石此項糧石併現在回子等請添交糧四千餘石即數每年支放所餘倉貯之糧三十餘萬石每年出陳易新自不至於霉變而倉中可得永遠備貯之糧如此酌籌辦理一年收穫足敷一年口糧其餘操演八百名兵丁亦敷充當各項差使奉硃批知道了欽此

嘉慶四年三月將軍保甯奏言綠營三千種地兵丁內令八百名操練營差二千二百名種地納糧如許來年仰賴 聖主洪福俱各豐收每歲除由綠營兵丁民人回子等所交穀石內支放官兵外尚餘糧一萬石有餘計現在各倉所存貯穀三十六萬石有餘足敷二年支放雖極邊之地積蓄官兵口糧益多益營但按年積累過多以致霉變亦似可惜理宜稍爲變通籌辦伏思極邊之地兵丁技勇所關緊要伊等雖更換種地乘暇操演究竟不能熟練今各倉既有永貯支放二年餘糧請由現在種地二千二百名兵丁內撤出四百名令一千八百名種地更換操練技勇再添兵四百名不惟每歲所收之糧支放仍復有餘而兵丁技藝亦可嫻熟奉 旨甚是著照所請辦理欽此

嘉慶九年二月將軍松筠奏言據署總兵納爾松阿呈報該十八屯所種地畝仍照原任將軍伊勒圖

所辦停歇章程仍令種十五屯地畝之處請示前來查此處地畝不似內地用糞各屯地畝俱係耕種一年停歇二三年耕種始得肥沃豐收起初綠營曾共耕種二十五屯後因替換停歇不敷於乾隆四十七年經前任將軍伊勒圖奏明倉中貯穀既多必至腐朽而邊疆地方操練兵丁亦屬緊要減去十屯撤出兵丁操演止種十五屯地畝一則爲操演兵丁再則因地畝久種不能肥沃欲使輾轉更換停歇是以如是酌籌辦理嗣於乾隆五十四年經前任將軍保甯以多貯穀石亦屬緊要奏准增添七屯共二十七屯耕種地畝嘉慶四年又經保甯以貯穀既多酌量裁撤兵丁令其操練奏准復裁減四屯此仍係因時籌辦今該署鎮納爾松阿以現在所種十八屯地畝請仍照從前替換停歇等情合而計之倉存穀石四十萬有餘其所請裁減者雖亦與從前伊勒圖定擬耕種十五屯地畝之數相符但停歇地畝亦不可不定年限從前經伊勒圖定擬耕種十五屯地畝後隔七年既經保甯奏明添種應如納爾松阿所請令暫裁三屯照舊耕種十五屯地畝嗣後不許停歇七年應令五年停歇限滿仍前添種現撤三屯兵丁照舊操演暇時令其修補各該城墻垣務使完整奉 硃批著照所請辦理欽此嘉慶十三年將軍松筠奏言前於嘉慶九年爲按照舊辦章程歇種地畝奏裁三屯摺內當經聲明歇屯五年限滿自十四年爲始即應再加三屯耕種相應奏明飭行屯鎮總兵國興阿自十四年爲始照

例加種三屯奉 旨知道了欽此

嘉慶十年將軍松筠奏言伊犁塔爾奇地方向設水磨一座係六營各屯攤撥弁兵輪流應役該弁兵等由倉領麥每年磨麪十餘萬斤以爲出差官兵及各項當差遣犯口食應用每年磨麪運麪不獨常川占用弁兵車輛而所磨之麪新陳相接夏熟之際不無發變每遇官兵等支領多致不堪食用竟屬兩無裨益查此項糧石本係伊犁回戶每年交糧十萬石每石加納三升斛面餘糧從前每年出差官兵及各項差役應支口糧原屬有盈無絀自乾隆五十年前任將軍保甯奏添惠遠城滿營烏鎗步甲四百名每年應需口糧支放以來皆係歷年積貯斛面餘糧至嘉慶八年舊存餘糧俱已儘數支放所有步甲月支口糧自嘉慶九年不得不於正項糧內支給如此年復一年必致存倉正項虧短實非慎重倉儲之道因思裁撤綠營磨麪運麪弁兵儘可分撥各屯加給籽種耕種自明年秋收爲始每年共可增交小麥六百石所有回戶交糧每石既有斛面三升而綠營屯工不交斛面殊覺偏袒應令屯工一體每石加交斛面三升每年又可增交小麥九百餘石合之每年回戶斛面餘糧三千石三共餘糧四千五百餘石通計每年足敷支放烏鎗步甲及出差官兵各項差役應領口食之需仍著糧餉處按年查明報部備案再查回戶交糧不獨每石加交斛面三升其每斛足數七十觔外尙有鼠耗至綠營

各屯交糧從前止交鼠耗並無斛面而其每斛舛秤竟至不如回糧舛秤足數支放實於官兵月支有礙今雖增交斛面其所有不敷舛秤仍應補交以足民食而歸實貯奉 旨據松筠奏酌裁水磨加增屯糧一摺其所稱裁撤水磨將綠營磨麵運麵兵丁分撥各屯種地納糧於官兵等較有裨益所奏似尙可行惟令綠營屯工於納糧時一體加交斛面並補足鼠耗舛秤之處雖係比照回戶一律辦理但亦須體察綠營各屯是否力能加納並恐開藉端勒索浮收之弊保甯在伊犁有年於該處情形素爲熟習著將松筠事宜悉心詳核妥議具奏欽此當經保甯議奏奉 上諭前據松筠奏酌裁水磨加增屯糧一摺因保甯前在伊犁年久熟悉該處情形發交核議茲據保甯詳議覆奏伊犁塔爾奇地方向設水磨派撥弁兵輪流磨運麥麵以給各項應差兵役口食今因麥麵陳積霉變該官兵等情願領麥易麵自係實在情形且撤出此項兵丁仍可分屯耕種增交麥石於倉儲亦有裨益著卽照松筠所奏行其請令綠營屯工交納糧石時與回戶一例加交斛面三升並補足舛秤之處綠營兵丁派撥屯田仍須兼習操防原與回戶專事種藝者有別所交糧石但應令其照原定斛額交足舛數若責令加交斛面三升恐丁力不免拮据且倉員等或藉詞勒索浮收尤易滋弊松筠所奏不可行至惠遠城滿營添設鳥鎗步甲每年支放口糧現於存貯正項倉糧內動用恐致日久短絀據保甯奏稱伊前任將軍

時因倉貯過多曾經奏准於屯田兵丁二千五百名內撤出四百名輪流操演原擬於數年後察看糧石盈絀再行酌辦今儲存餘糧既虞全數支放莫若於原撤屯兵內再量爲派撥分屯耕種每年所收糧石逐漸加增不惟官兵口食足數支給倉貯亦可日臻饒裕等語保甯所議較爲妥協着卽照議行欽此

嘉慶九年將軍松筠奏言伊犁種地回子六千戶從前每年每戶交糧十六石通共每年交糧九萬六千石迨後生齒日繁添墾地畝於乾隆五十四年奏明又共續增交糧四千石是六千回戶四十餘年生齒倍加阿奇木伯克鄂羅木雜布懇借厄魯特游牧閒地暫給回子墾種以資生計現在仍自徧覓餘水設法開渠冀墾戈壁曠土殊屬急公因查遣屯地畝種多與其屯種有名無實莫若撥給回子耕作俾應納官糧盈餘卽可養贍家口庶於回子公私均得實惠詢之厄魯特總官等願將本年回子借種之地一併撥給又春稽地方有田二千餘畝亦准回子耕種鄂羅木雜布及伊什罕伯克等咸稱情願每年交納小麥二千石以供銅鉛廠夫口食奉旨著照所請將哈什河南遣屯地畝改撥伊犁種地之六千回戶耕種仍將本年回子借種厄魯特之地一併撥給其春稽地方有田二千餘畝亦準回子耕種每年交納小麥二千石以供銅鉛廠夫口食欽此